



17. maj 2011

Inatsisartut Suleriaasianni § 37 naapertorlugu Naalackersuisunut apequt imaattoq matumuuna saqqummiuppara:

**Naalackersuisunut apequt:**

**Apequt siulleq:**

**Aningaasat qanoq amerlatigisut Namminersornerullutik/Namminersorlutik Oqartussat ataatsimut piviusumik atorsimavaat inissanik sanaartornermut (ineqarnerup iluani) ukiuni ataasiakkaani piffissami 2006-mit 2010 ilanngullugu? ”Ataatsimut piviusumik” oqarnermi pineqarpoq, aningaasat sanaartornermut atorneqarsimanissaat Sanaartugassanut Iluarsagassanullu Aningaasaateqarfimmut inissinneqaannaratik kingusinnerusukkut atugasannngortinneqarlutik.**

**Apeqqutit aappaat:**

**Apeqqummi siullermi atuinerit nalunaarsorneqarsimasut qanoq sumiiffinni ukunani agguataarneqarsimappat?**

- Nuuk
- Sisimiut
- Ilulissat
- Qaqortoq
- Illoqarfiit sinneri
- Nunaqarfiit

**Apeqqutit pingajuat:**

**Inissat qassit, ajornanngippat inittussuseq kvadratmeterinngorlugu uuttuutigalugu, apeqqummi siullermi ukiuni ataasiakkaani ataatsimullu piviusumik sananeqarsimappat, ilagalugu aallartinneqarsimallutik, apeqqummi siullermi aningaasartuutitut nalunaarsorneqartuni. Akissut apeqqutit aappaanni sumiiffinnut taagorneqarsimasunut agguataaqquneqarpoq.**



**Apeqqutit sisamaat:**

**Maannakkut pisumut/ kingullermik nalunaarsorneqarsimasumit nalunaarsuummik kisaateqarpunga inissianut naliginnaasunut naliginnaasumik utaqqisut aammalu piffissaq utaqqiviusoq agguarneqarsimassalluni apeqqutit aappaanni sumiiffinni taakkartorneqartuni.**

**Apeqqutit tallimaat:**

**Aningaasat qanoq amerlatigisut Naalakkersuisut, taassumallu ataani Iluut A/S, inissanik sanaartornermut atulikkersaarpaat 2011-minngaanniit siumut ukiuni missingersuusiorfiusuni tamani agguarneqarluni apeqqutit aappaanni sumiiffinni taakkartorneqartuni?**

**Apeqqutit arfernat:**

**Inissat qassit, ajornanngippat inittussuseq kvadratmeterinngorlugu uuttuutigalugu, apeqqutit tallimaanni aningaasartuutitut nalunaarutigineqartunut naatsorsuutigineqarpa sananeqassasut? Akissut kissaatigineqarpoq apeqqutit aappaanni sumiiffinnut taakkartorneqartunut agguarneqassasoq.**

**Apeqqutit arfineq aappaat:**

**Oqallittarnermi Nuuk, Sisimiut, Ilulissat Qaqortorlu eqqaakkajunneqartarput tassaasutut illoqarfiit sisamat ineriartornermi qitiusutut. Naalakkersuisut taamatut oqaaseqaat isiginerlugu arlaatigut aningaasaqarnikkut piviusorsioirtortaqtutut? Aamma Naalakkersuisut nalilernerlugu illoqarfinni taakkunani immaqqa aningaasarsionnikkut siuariartorneq, tamakkiisumik annertuumilluunniit, peqquteqartinneqarsinnaasoq pisortaniit aningaasaleeqataaffigineqarsimasut inissanut aningaasaliinerit?**

**Apeqqutit arfineq pingajuat:**

**Naalakkersuisut ataani tunngavilersuutigisanni inissanik sanaartornermut tunngaviusumik isummersuutikka isumaqatigalugit nalunaarutigisinnaanerlugu, aammalu Naalakker-**



suisunut ilaasortaq qanoq isumaqarpa tamanna isumaqatigiinneq tigussaasunngorluni ersersinneqartoq ineqarnermut politikki? Taassumap ataani aamma immikkut paasisstissiissutigitikkusunnarpoq, qanoq annertutigisumik Naalackersuisunut ilaasortap, uattulli, isumaqarnerseq inissanik sanaartornerup annertunerpaamik ikorfartussagaa innuttaasut namminneq inissanut kissaataat, innuttaasunit ersersinneqarluni inissanut utaqqisuni naqitsinikkut sumiiffinni innuttaasut namminneq nutserfigisaanni, najugaqarfinniungitsoq innuttaasut qimagarfigisaanni?

**Apeqqutit quligiluaat:**

Naalackersuisut tigussaasunik pilersaaruteqarnerlutik inissanik sanaartornermut allatut tulleriiaarinissamik imaluunniit aningaasaliissutinik annerusumik allannguinnissamik, eqqarsaatiginnikkaanni naatsorsuutigineqarsinnaasut saqqummiunneqarumaarlutillu piviusunngortinneqarumaartut Akileraartarneq Atngarissaarnerlugu pillugu Isumalioqatigiissitap siunnersuutigisimasai?

(Inatsisartuni ilaasortaq Niels Thomsen, Demokraatit)

**Tungavilersuut:**

Saneqqunneqarsinnaanngitsumik piviusuuvoq aningaasaatitta killeqartuaannarnerat. Taamaattumik aningaasaatigut pingarnersiortuaannartariaqassuagut. Annertunerusumik annikinnerusumillu. Tamatigut anguniagaq pingaarutilik tassaasuaannassooq aningaasat pitsaanerpaamik ator-neqartarnissaat.

Aamma piviusuuvoq nunatsinni najugaqarfinni tamani akilersinnaasumik inuussutissarsiutitigut ineriartortitsisoqarsinnaanngitsoq. Taamaattumik maannakkut siunissamilu ineriartornermi qiti-usut periarfissaat nukittorsartariaqarpagut. Ilaatigut taamaaliorqassooq taakkunani inissanik sanaartorneq siuarsaavigalugu, uppersaatissaqartilluni pisariaqartitsivittoqartoq.

Ini peqqinnartoq piffissamullu naapertuuttoq toqqammaviulluinnartuuvoq ilaqutariit ingerlalluarnissaannut. Ilaqutariit inooqatigiinnikkut aningaasaqarnikkullu ingerlalluanngippata piviusunngortikkuminaatsorujussuusooq siunertaqarnerput inuiaqatigiittut imminut napatilernissamik.



Maanna inuussutissarsiutitigut aaqqissuussaaniqut pisortat tapiiffigisartagarisaat inissanik sanaartorneq aamma sanaartornermi annertuumik iluaqutaavoq.

Sanaartorneq ingerlalluartoq aningaasaqarnikkullu patajaatsoq aamma pingaaruteqarpoq inuussutissarsiummik pilersitsinissami, ukiuni aggersuni inuiaqatigiit atungarissaarfiusut aningaasalersorneqarnissaani, ukioqatigiiaat angisuut utoqqalinersiaqalerpata aningaasaqarniarnikkullu naqitsinermik pilersitsillutik.

Ineqarnermut politikimi oqaatsit qitiusut tassaasariaqarput aningaasaqarnikkut akunnaassuseq, paasiuminassuseq, nunap iluani nuttartarnermut naapertuuteqatigiinneq aammalu siunissamut ungasinnerusumut aningaasaqarnikkut qajannaassuseq.

Apeqquteqaateqarninni kissaatigivara nalilersorsinnaassallugu maanna ineqarnermut politikki ingerlanneqartoq pisariaqartitanut taakkununga naapertuunnersoq.

Naalakkersuisut akissuteqaateqarnerminni qinnuigivakka pisariaqartillugu tabellit grafillu atussagaat. Ajornanngippat kissaatigerusuppara apeqqtini 1-6-mut paasissutissat tabellimut ataatsimortinneqassasut.

Inussiarnersumik qinnutigerusuppara Naalakkersuisut akissuteqaataat tigussallugu ullut suliffiusut qulit ingerlaneranni. Akissuteqaat kinguartittariaqalissappat qinnutigerusuppara piaartumik nalunaarfigineqarnissaq ilanngunneqarlunilu qaqagu akissutissamik pinissara, taamasinikkut naatsorsuutigigakku kinguartitsisoqassappat kingunerissagaa akissuteqaatip pitsaassusiata qaffasinneruneranik.